

四庫全書

史部

欽定四庫全書

史部

欽定八旗通志卷

一百六十九至
一百七十

欽定四庫全書

欽定八旗通志卷一百六十九

人物志四十九

大臣傳三十五

滿洲鑲白旗三
納額司泰

塔勤岱 希福
格斯泰 賽喀

杭愛 彰庫 瑪奇 博齊 二格 鄂海 福
敏

格斯泰

格斯泰滿洲鑲白旗人姓瓜勒佳先世居瓦爾喀

父赫勒

太祖高皇帝時隨其叔祖幹珠率族來歸幹珠任佐領赫勒任驍騎校

太宗文皇帝崇德三年睿親王多爾袞統師征明由青山口入邊越燕京攻獻縣赫勒樹雲梯先登克其城六年襲管佐領事七年隨饒餘貝勒阿巴泰征明自薊州南畧至山東屢敗敵兵

世祖章皇帝順治元年豫親王多鐸追勦流賊李自成破潼關二年移師平河南江南赫勒並在事有功尋

從端重親王博洛征浙江敗敵於嘉興城外四年
彙敘軍功予雲騎尉職世襲罔替遇

恩詔晉騎都尉尋卒長子格森襲職格斯泰赫勒次子也
初為睿親王府一等護衛裁革未補尋充護軍校
隨寧海大將軍伊勒德勦海賊於浙江署前鋒侍
衛順治十三年大軍由寧波乘舟趨定海偽伯阮
思偽總制陳六御等率眾三萬列二百餘艦於衡
水洋格斯泰率眾擊卻之諸軍並進斬阮思陳六

御等遂定舟山格斯泰得頭等功牌二

聖祖仁皇帝康熙二十年隨都統瑪奇討逆孽吳世璠由
廣西進征敗賊於石門坎黃草壩攻克雲南城凱
旋擢前鋒叅領兼管佐領二十九年七月

命裕親王福全為撫遠大將軍征噶爾丹內大臣佟國綱
前鋒統領邁圖等為叅贊格斯泰隨征八月朔師
次烏蘭布通噶爾丹於隔岸樹林中卧駝為營兵
伏其後佟國綱率兵進擊中鎗歿格斯泰直入賊

營左右衝擊賊莫敢當出而復入者再諸將士由
山腰遶賊後擊之潰遁格斯泰乘勝窮追為河岸
淖泥所阻賊衆掩至格斯泰力戰與邁圖及護軍
叅領赫色巴錫巴雅爾瑞岱營總韓大任前鋒校
珠旺勒等皆歿於陣議卹有差

賜格斯泰祭奠如副都統例初大兵將出征時

上賜護軍叅領等人各一馬前鋒叅領未預格斯泰請給
命自往上駟院選擇馬有白鼻者格斯泰願得之或言此

金史卷一百六十九
馬固雄駿然白鼻自古所忌恐不宜用格斯泰曰
効命疆場吾夙願也何忌焉遂乘馬行至是裕親
王奏言與賊戰時親見一將乘白鼻馬三入敵陣
衆皆識為格斯泰也櫬至京

遣侍衛奠茶酒部議予雲騎尉世職

上曰格斯泰効力年久勞績顯著再與一雲騎尉合併為
騎都尉以其子幹珠罕襲後以襲次滿傳襲

今上乾隆十五年

詔核八旗世職之以死事卹敘而襲次已滿者

特予恩騎尉世襲罔替復以格斯泰之曾孫英福襲

賽喀納

子納齊喀

賽喀納滿洲鑲白旗人姓布賽初任典儀

世祖章皇帝順治十四年授二等侍衛尋擢一等侍衛

聖祖仁皇帝康熙九年二月授護軍叅領十四年三月察

哈爾布爾尼叛

上命信郡王鄂扎為撫遠大將軍大學士圖海為副將軍

討之賽喀納隨征師次達祿聞布爾尼以兵三千
屯踞山後大兵緣山谷而進賊兵二百伏山溝突
出衝犯賽喀納奮勇擊敗之遂進擊屯聚賊衆布
爾尼散卻旋收集潰卒千餘排列烏鎗接戰賽喀
納擊敗其前隊賊遁據山巔大軍分路並進賽喀
納領隊扼其要隘斬獲甚多布爾尼逃奔扎魯特
境之貴勒蘇台山後為科爾沁右翼總管沙津射
殪斬首馳獻大軍凱旋叙功予賽喀納雲騎尉世

職二十一年十一月授鑲白旗蒙古副都統二十二年九月調鑲白旗滿洲副都統二十七年五月卒次子薩木齊喀襲職長子納齊喀初官內閣中書康熙四十五年十月隨大學士席哈納往湖廣鞫訊容美土司田舜年私鑄擅殺罪狀還京轉典籍四十九年遷刑部主事五十二年遷本部員外郎時皇太子允礽護衛德麟獲罪其父阿哈占任

福陵總管

上命其自行拘禁德麟詐自縊死潛逃竄奉天將軍塘保
住以奏

上命選才幹司員訪緝納齊喀同主事舒琳往膠州捕獲
之德麟伏誅納齊喀議敘即陞尋授兵部郎中五
十四年辦事密本房五十七年任揚州推關監督
期滿派往阿爾台養贍歸附之烏梁海厄魯特事

竣回兵部任兼佐領六十一年十月授山西布政使
世宗憲皇帝雍正元年正月擢湖北巡撫二年十二月疏

言湖北州縣全食淮鹽近因生齒浩繁正慮食鹽不敷巴東縣與四川夔州府之巫山縣連界山峻路險商販罕至今縣北紙倍溪山中忽湧鹽泉試令煎熬日得鹽二千觔有奇計每歲可得七十萬餘觔請

勅部酌照淮鹽川鹽設引起課于

國計民生均有裨益事下部議令會同兩淮巡鹽御史詳酌以行三年二月疏言康熙五十九年截留

漕米六萬石分發近水州縣貯倉備賑已閱五載
紅朽堪虞請於青黃不接時平糶以裕民食俟秋
成後計所糶米一石可易穀二石如歲豐穀賤尚
有贏餘一并還倉積貯庶可經久疏上得

旨納齊喀奏請湖北各州縣所貯米石易穀存倉以為經
久之計具見實心辦事殊為可嘉尋以疾奏請解任

詔總督楊宗仁暫署巡撫納齊喀給假調養俟病痊任事
遣太醫診視齋

賜珍藥及復四觔五月卒年六十遺疏上得

旨納齊喀簡任巡撫敬慎自持實心任事忽聞溘逝朕心
深為軫惻下所司議卹部議納齊喀任巡撫未滿三年
以致祭一次可否給半葬請

上命給全葬並

予諡勤恪

額司泰

額司泰滿洲鑲白旗人姓富察大學士額色赫弟

也初事

世祖章皇帝任一等侍衛

聖祖仁皇帝康熙三年授鑲白旗蒙古副都統九年遷護

軍統領十二年逆藩吳三桂反

上命順承郡王勒爾錦統師征討以額司泰叅贊軍務會

侍衛阿爾賽自荊州還奏賊由貴州陷沅州總兵

崔世祿降賊澧辰道梗湖以南半入於賊總督蔡

毓榮亦飛章入告因

詔額司泰同護軍統領伊爾都齊簡精銳先發十三年二月抵荊州

上以常德長沙二郡為三楚要地

命額司泰與前鋒統領碩斌都統珠滿移駐守禦值二郡已為賊陷仍駐荊州未幾賊將劉之復陶繼智率賊萬餘犯宜昌營於江之兩岸總兵徐治都告急額司泰乃自荊州移師赴援與徐治都等率舟師橫江逆擊戰甫接賊潛以三百人登岸擾我後我

師分擊敗之得賊舟三賊遁走越三月師次岳州
界時三桂據澧州其黨吳應麒廖進忠柯鐸高起
隆據岳州馬寶張國柱復率賊二萬自澧州水陸
並集並於陸地設鹿角阻我騎兵額司泰與貝勒
察尼將軍尼雅漢定議山岡為賊門戶令前鋒兵
先奪之以扼其吭繼令護軍驍騎分路堵截且檄
綠旗兵奪據城陵磯及七里橋使賊首尾不相顧
至期聞貝勒營吹角額司泰率前隊戰艦擊賊眾

軍以次並進攻燬賊船殲賊萬餘賊退踞七里橋
東木柵乃收兵還營是年冬奉

詔叅贊貝勒尚善軍規復岳州值賊勢披猖我軍未能進
取久相持十五年三月

上諭尚善曰頃安親王岳樂已復萍鄉醴陵進取長沙逆
賊吳三桂遣其黨馬寶高起隆自岳州赴援賊勢既分
毋坐失機會於是尚善部勒水陸諸軍令額司泰統率
進剿賊船列陣洞庭湖鐵鎖鉤連礮火矢鏃如雨

額司泰自率銳卒衝其北令副都統路什擊其南
軍士皆奪船奮進大敗賊追擊三十餘里賊之據
君山者皆遁獲船五十二偽印五肅仗盔甲無算
擒賊百七十餘人十六年二月卒於軍先是統師
王貝勒屢奏額司泰敗賊功皆得

旨嘉獎俟事平日議敘至十九年大軍凱旋部議王貝勒
大臣征岳州時退縮不前罪額司泰既病歿應籍
家產

上原宥之

塔勒岱

塔勒岱滿洲鑲白旗人姓博和哩先世居黑龍江

祖額徵古

太宗文皇帝天聰時來歸塔勒岱初任前鋒校

聖祖仁皇帝康熙元年隨定西將軍愛星阿由雲南入緬

甸追擒明桂王朱由榔在事有功十年授前鋒侍

衛十三年逆藩吳三桂之黨譚宏吳之茂王屏藩

等據四川塔勒岱隨前鋒統領穆占勦賊於野狐
嶺賊以千餘衆伏林箐出步騎百餘誘戰塔勒岱
先衆迎擊敗賊盡發其伏分隊撲勦賊俱竄走復
擊敗偽總兵葉某於陽平關進征保寧偽總兵鄭
歪嘴吳印龍韓天福等先後率衆水陸來犯咸擊
卻之自蟠龍山還至郿嶺及龍潭驛兩遇賊衆邀
截並擊之潰遁敘功予雲騎尉世職值陝西提督
王輔臣叛據秦州平涼塔勒岱隨穆占往勦敗偽

總兵高鼎於隴州進圍秦州擊卻賊兵之自平涼
保寧來援者秦州既下遂趨平涼屢擊敗迎戰賊
衆十五年王輔臣降吳三桂尚據湖南穆占奉

詔為征南將軍移師湖南塔勒岱率兵隨十七年駐師攸
縣賊將王國佐屢率衆犯城塔勒岱戰卻之復敗
偽總兵黃士彪裘萬寶於鄴縣桂陽州諸處十八
年敗賊將吳國貴吳應麒等於永州沅州凱旋授
護軍叅領二十年調前鋒參領二十三年擢前鋒

統領二十四年擢鑲白旗蒙古都統彙敘陝西湖
南軍功晉世職為騎都尉兼一雲騎尉二十五年

七月卒

賜祭葬如典禮謚勇壯子奇蘭布襲職

希福

希福滿洲鑲白旗人姓納喇由六品筆帖式補授
刑部員外郎康熙六年京察二等輔政大臣鰲拜
因與希福叔父賽音布有隙矯

詔將希福並其兄戶部主事紀泰革任八年鰲拜得罪紀泰始訴寃部議復紀泰及希福職九年五月補原官尋遷吏部郎中十八年四月遷內閣侍讀學士五月擢內閣學士二十年五月充

經筵講官六月授兵部右侍郎二十一年調吏部右侍郎二十二年二月遷都察院左都御史四月疏言海內大定提鎮諸臣宜次第入

覲以重間寄得

旨在外提鎮等官鎮守封疆關係緊要若概令來朝遠離
汎地必致曠職如有應陞見者奏請候旨定奪八月授
川陝總督二十三年二月疏言漢中舊有駐防滿
洲兵及城守副將一員兵八百餘名所屬并要隘
駐防兵又二十餘名其地歲征糧米散給本處各
營已恐不敷今又移臣標官兵七千並家口三四
萬往駐兵糧不足勢必令西安州縣饋餉西安距
漢中千餘里棧道轉運甚艱請撤漢中駐防兵仍

駐西安臣撥標下將官馬兵五百火器營兵五百
同滿洲兵輪班往駐臣每年秋後親往巡察一次
兵民俱無累下部議行又疏言前奉

諭旨撥臣標官兵駐廣元廣元距秦省甚遠棧道崎嶇所
撥兵千名馬千匹應支糧草難帶本色今廣元亢
旱物價騰貴恐致糜費請照秦省糧價給兵自行
採買從之二十四年四月疏言洮州界接諸番舊
設副將駐守前因逆賊王輔臣變亂移副將駐岷

州而以守備駐洮州原為易於調遣今兩地已平
岷州雖要較洮州差緩請仍舊下部議行五月疏
請免追進川兵丁長支錢糧九卿兩議一請

勅巡撫提督等詳察一請

遣大臣嚴查得

旨向年軍興之時兵丁甚屬勞苦若嚴行扣追朕心甚為
不忍此項錢糧應與豁免以示朕優卹士卒至意二十
五年閏四月疏言川省地廣人稀土司番蠻雜處

恐有私收軍器禁物及奸徒串賣等弊各官慮踈防範請嚴行禁止定例處分如所請行又言四川撫臣姚締虞才學優長蒞任未久得民情

上以希福徇情保薦令明白回奏尋下部議降二級調用得

旨從寬留任八月疏叅延綏總兵李承恩年老戀職應勒休從之九月遷刑部尚書二十六年二月因少詹事覺羅僧參被盜希福審理失實經宗人府題叅

革職又雲貴總督蔡毓榮於任湖廣總督時坐視
湖南城池失陷嗣任雲貴總督隱吳逆財物希福
承審瞻徇不逐款嚴訊從輕擬罪部議希福已于
別案革職應枷號鞭責得

旨希福著照部議完結後發往黑龍江披甲効力贖罪尋
卒

杭愛

杭愛姓黃佳先世居貝琿山沁高祖桑武於

太祖高皇帝時來歸後隸滿洲正黃旗尋改隸鑲白旗父

古爾嘉琿

世祖章皇帝順治初年任國子監祭酒杭愛初任禮部筆
帖式旋擢主事累遷吏部郎中康熙十一年授山
西布政使

聖祖仁皇帝諭之曰朕以爾才能向欲內用今因外省事
重特授此職督撫之下藩司職掌最要爾其克盡忠誠
以副簡用十二年擢陝西巡撫十三年逆藩吳三桂反

滇蜀煽動文武率叛降賊

上命都統錫卜臣為鎮西將軍與副都統巴喀等駐守西
安復遣都統赫葉為安西將軍率師入蜀

特諭杭愛督運糧餉遣發官兵水陸防護會提督王輔臣
叛降吳逆杭愛與總督哈占復奉撫綏招徠之

命十四年二月賊陷皋蘭河西道梗饋餉不繼大兵進規
四川又悉取道於陝杭愛因疏言大兵日需糧餉
皆取給西安鳳翔諸府若僅由陸轉輸山路崎

峴緩不及事必兼水道並運庶足濟軍食應遣員
赴畧陽亟營船艦以速糧運并請募商運糴兼開
納粟事例以足軍需事並下部議行十九年調任
四川巡撫大兵方分道進取滇黔杭愛督理軍餉
以地經新復部選人員多未蒞任且水道舟艦無
多不能濟運上疏論之奉

諭陝甘督撫卽以畧陽運艘直運叙州會叛鎮譚宏據萬
縣煽亂巫山雲陽間

上命將軍噶爾漢等速剿譚宏仍

勅杭愛與將軍烏丹等慰撫愛州諸路以安反側明年建
昌土司安泰寧招集賊衆陰蓄亂謀勇略將軍趙
良棟奏請殄除之

上以小醜不足煩兵力

勅杭愛與將軍王進寶先往招撫不服而後移兵誅剿杭
愛因申諭以禍福泰寧懼遂來降是時滇黔尚未
靖總督哈占以大兵由永寧進征需糧甚亟請於

永寧瀘州諸路採買支給杭愛奉

詔籌計督趣輸運先是吳逆倡亂四川郡邑悉為賊據百姓逃亡弁兵強佔民田抗賦不納至是杭愛疏言方今逆孽漸平逃亡漸歸請急行清理佔種民田者令即給還違者論罪若開墾年久無原業主憑契領歸者仍聽佃種輸賦得

旨先行二十一年又以從逆巡撫羅森任內捏報墾荒四百餘畝陞科無出未便累民疏請豁免部議不准

詔如所請二十二年七月杭受卒於官

賜祭葬如例謚勤襄祀四川名宦祠

彰庫

彰庫滿洲鑲白旗人姓瓜勒佳父多克索哩於

太宗文皇帝崇德三年從征明攻南皮縣以雲梯先登克
之

賜號巴圖魯予騎都尉世襲罔替

世祖章皇帝順治七年九年三遇

恩詔晉二等輕車都尉既卒彰庫襲

聖祖仁皇帝康熙十三年以驍騎校署叅領隨定南將軍
希爾根征逆藩耿精忠至江西賊已陷建昌撫州
等府乃先勦賊撫州偽都督易明擁兵拒戰擊敗
其衆賊合建昌援兵夾犯我軍復大敗之又殪偽
都督楊益茂等於七里岡賊將邵連登衆號八萬
令偽都督九人分領依長興山掘壕排列彰庫率
兵衝擊屢有斬獲又至宜黃縣擊敗賊衆旋赴建

昌敗賊將李茂珠李復勝等於城南之鎮鼓山十
九年五月隨都統勒貝勦賊廣西柳州時逆孽吳
世璠之偽將軍范齊韓詹仰等糾賊二萬列柵於
柳州之陶登彰庫領隊進擊斬獲甚衆賊潰遁二
十年正月隨平南大將軍賁塔進征雲南連破賊
將何繼祖王宏勳等於石門坎黃草壩等處乘勝
薄雲南城下擊敗迎戰賊兵七月隨都統希佛追
賊將馬寶巴養元戰於烏木山大敗之馬寶等窮

威來降是年賊平凱旋任佐領二十二年授護軍
叅領二十五年敘功予騎都尉世襲罔替合所襲
之職為一等輕車都尉又一雲騎尉三十六年擢
正藍旗漢軍副都統四十年調鑲黃旗蒙古副都
統四十四年調鑲黃旗滿洲副都統四十五年致
仕四十七年十二月卒禮部以應否給與祭葬請
諭曰彰庫自任副都統以來並無顯著功績副都統祭葬
著停給所有世職應得卹典照例給與子海寶康熙三

十三年進士官翰林院檢討襲世職

瑪奇子常賚

瑪奇滿洲鑲白旗人姓納喇

國初有哈達萬汗之族素巴海率二百人來歸為世
管佐領瑪奇其曾孫也初由顯親王府護衛遷長
史旋擢護軍統領康熙十八年十二月遷鑲白旗
滿洲都統列議政大臣十九年三月

上念廣西進征大兵勞苦日久宜令番休

命瑪奇偕都統趙璉副都統宏世祿統兵赴廣西更代師
次柳州降偽將王宗孝等三千餘人十月征南大
將軍賚塔由南寧進取雲貴

命瑪奇率兵急進十二月隨賚塔至西隆州率前隊兵進
抵石門坎偽將軍何繼祖王宏勲等糾衆萬餘據
險固守二十年正月瑪奇同都統勒貝等率前鋒
急奪隘口後軍繼進合擊自午至酉前隊綠旗兵
破矢盡引退賊四路伏發犯我軍前鋒護軍分隊

立侯賊近夾擊大敗之盡得其險隘分兵固守次
早率勝兵疾馳安籠所復其城復領右翼兵擊繼
祖及偽將詹養等於黃草壩破之奪營二十二進
軍曲靖連復馬龍州易龍所及楊林城賊據渾水
塘立營與嵩明州遙應分遣兵趨嵩明州乘賊不
備攻破東門賊逸出西門追斬偽遊擊守備等渾
水塘賊盡遁于是會貝子彰泰大軍直趨雲南省
城營歸化寺吳世璠遣其黨胡國柄劉杞龍等出

犯瑪竒率頭隊同諸將奮擊陣斬國柄杞龍遂圍
城十月偕勒貝等奪城西北銀錠山賊列礮抵拒
瑪竒等挺立當礮衝督兵掘壕築壘成俯瞰城
中縱礮賊不能支內亂世璠自殺克雲南城瑪竒
同部統穆占先入城撫民籍賊黨屬尋授鎮安將
軍駐防雲南瑪竒偕彰泰等奏留每佐領兵十名
駐省時希佛追勦叛黨胡國柱於建川州所率兵
有年久者應於駐省兵內派換瑪竒疏言滇省初

平土司猱猱甚多性情無定又新降官兵散處各地皆須防範若派換則需撥每佐領四名餘所留僅五名有奇未免單弱建川州距省千里山高路險遣換兵刻期難到即到後馬力疲乏亦難追寇若再需休養又恐坐失事機希佛現帶之兵足以辦賊事竣即率回京請將駐省兵停其往換以固守禦下議政王大臣議從之二十三年八月甄別八旗大臣瑪奇以才力不及革職尋

諭曰雲南兵丁屯駐日久今地方底定可乘此冬撤回十

月瑪奇統滿兵回京三十五年卒子常賚雍正元

年授工部員外郎遷郎中二年調戶部郎中三年

正月任通州坐糧廳十月授廣東布政使四年十

二月擢福建巡撫時廣東巡撫楊文乾請假葬親

命常賚署理五年七月疏言廣東近水田畝每苦夏秋潦

漲廣州肇慶二府所屬受衝為最請以廣州通判

兼管南海三水隄工肇慶通判兼管高要高明四

會隄工冬間督率隄長按戶派工務期修築堅固
定賞罰法保固至三四年者紀錄加級五年者即
陞衝決者鑄秩有差至搶修物料請仍徵魚簍鴨
埠等稅以充公用

詔允所請八月赴閩十一月疏言直隸河南山東山西陝
西廣東六省流犯例發福建安插臣抵閩三月各
屬流犯脫逃接踵皆因立法不嚴是以獲逃補配
者什無二三請嗣後流犯配後脫逃地方官逾限

不獲該管同兼轄官罰俸一年主守之保甲杖革
如逃回原籍族隣容隱按不應重律擬杖獲犯補
配日先枷責以正逃罪再加徒役三年庶流犯畏
法不敢逃地方官畏處分不敢不嚴緝矣部議兼
轄官罰俸六個月餘如所奏六年正月調雲南巡
撫先是常賚署廣東撫篆盜失摺匣鑰匙令匠役
私造將軍標兵窩盜獲贓狗庇不究龍門汛盜劫
兵械電白山賊劫人割耳從化山賊劫人勒贖並

匿不奏又與將軍石禮哈署督阿克敦布政使官
達訃奏楊文乾六月

諭曰常賚本朕藩邸微員因其平日謹慎安靜是以擢至
巡撫望其不忍欺隱也乃署撫任內盜失鑰匙潛匿不
奏尚得謂無欺隱乎且與石禮哈等黨同伐異其罪不
容貸著革職赴廣東質訊

命通政使留保工部郎中喀爾吉善往粵偕總督孔毓珣
會鞠各案常賚坐私造摺匣鑰匙擬斬七年十一

月

諭曰原任都統瑪奇征勦吳逆著有勞績伊子常賚居官
尚無贓款祇因與石禮哈阿克敦官達等傾陷楊文乾
又奏事不實以致罹於重譴今朕念伊父之功特赦其
罪候另用尋

命隨兵部尚書查弼納往陝總查軍需諸務八年五月擢
刑部右侍郎十二月署寧夏將軍九年二月

特授鎮安將軍統領肅甘涼兵五千自為一隊備應援五

月率兵駐安西八月授西路副將軍十年正月準噶爾賊兵侵逼哈密常賚偕都統良敦總兵張存孝率滿漢兵三千二百名前赴烏克克嶺備禦三月授內大臣仍留軍營七月隨大將軍岳鍾琪統兵萬二千移駐木壘九月自木壘移駐巴里坤十一年十月署大將軍查郎阿奏冬雪深積請分派大臣駐劄以慎防守副將軍張廣泗統兵一萬二百五十駐北山常賚統兵九千駐南山十三年閏

四月

命統綠旗兵一萬留駐巴里坤提督顏清如尚書馬會伯
為副嗣準噶爾乞和乾隆元年六月撤巴里坤兵
與留駐哈密之提督樊廷總兵米國正管轄還京
任內大臣五年九月因疾乞罷

命以原官致仕予半俸十一年八月卒

賜祭葬如例

博霖

博霽滿洲鑲白旗人姓巴雅拉康熙十九年由護
衛授長史二十二年擢鑲白旗蒙古副都統二十
三年八月遷鑲白旗蒙古都統九月調鑲白旗滿
洲都統二十四年授江寧將軍三十一年調西安
將軍三十五年二月撫遠大將軍費揚古奉

命由西路勦噶爾丹

上命博霽統滿洲兵自寧夏往會費揚古軍五月大敗噶
爾丹于昭莫多敘功授雲騎尉世職准襲一次十

一月

上以噶爾丹窘迫必走哈密

命博霽擇西安兵未出征人材強壯者與將軍孫思克同
偵禦三十九年七月

上諭大學士等曰聞博霽自江寧赴西安時軍民哭送直
至浦口彼若不善何能如此誠可謂將軍矣四十二年
聖駕西巡

閱西安官兵

上以博霽訓練有方

賜御用橐韃及弓矢

諭曰朕巡幸江南浙江盛京烏喇等處未有能及爾西安兵丁者爾處官兵俱嫻禮節重和睦尚廉耻且人材壯健騎射精練深可嘉尚慎勿令其變易四十二年正月授四川陝西總督先是

上西巡時以河南府居各省之中水路四達應截留豫省漕糧儲其地間遇山陝歉收即可由黃河挽運恐

經三門底柱舟不能逆上至是

命博霽偕陝西巡撫鄂海河南巡撫徐潮山西巡撫噶禮
會勘三門底柱四月合疏言臣等會勘三門中流
為神門水勢甚溜南為鬼門更洶湧北為人門勢
稍緩三門之下為底柱再下二里卧虎灘臣等用
船載糧三十石從卧虎灘挽上人門溜急灘多行
舟艱難不如陸運便豫省漕糧截留于河南備貯
陸運至陝州西門外太陽渡上船計三百餘里費

較河路減下九鄉議如所請四十五年疏言去歲
秋特奉

諭旨念民間所用升斗大小不同令部臣較鑄平準頒行
臣已照式鑄造轉發各屬但陝甘收糧舊用永豐
倉斗駐防兵糧亦以此支放相沿已久今以部頒
新斗較量一石計短少三斗如以新斗收受即以
新斗放給則十分之中已減三分兵馬糧料不無
艱窘況陝甘兵馬較他省最多倘有行走全賴士

飽馬騰查收受民糧時尚有多收耗糧一項未革
請將此項耗糧永行禁革百姓交糧令照舊斗之
數以新斗交收支給兵糧亦照舊斗之數以新斗
量給則耗糧革絕民已樂輸恐後而陝甘滿漢十
餘萬兵丁俱仰沐格外之

恩矣下部議如所請其永豐倉斗永行停止四十七年閏
三月卒遺疏入

諭曰博霽久任將軍簡授總督効力有年巖疆重寄正資

料理忽聞病逝朕心深為軫惻應得卹典察例具奏尋
賜祭如例嗣子寶山襲雲騎尉寶山卒停襲

二格

二格滿洲鑲白旗人姓富察康熙二十六年由筆
帖式授內閣中書歷遷理藩院郎中詹事府少詹
事四十四年遷詹事尋擢內閣學士四十五年五
月教習庶吉士先是湖廣總督石文晟劾奏容美
土司田舜年私造宮殿暴虐奸淫種種不法舜年

叅革伊子田昞如假捏昞如幼子田翼南年歲希圖承襲並劾桑植土司向長庚容匿昞如抗不解

審六月

上命二格偕左都御史梅鋐赴楚會同文晟等鞫之時舜年赴武昌申訴文晟拘之尋病卒長庚亦解昞如聽勘九月會鞠梅鋐石文晟各執一議具奏二格以証佐未集獄辭未定不便立議疏言昞如長庚已到案取供至田舜年各款僅取族侄田瑛如供

詞梅銷等俱欲以現取口供完結臣以為瑛如與
舜年同被獲之人非舜年子弟伊親子及案內証
佐二十餘名無一到者未經質審處甚多舜年治
病之醫及檢屍之知縣洪國輔俱未到案舜年死
未明白倘草率完結無以服衆土司心得

旨總督石文晟原叅田舜年建造宮殿行兇作惡是以羈
留武昌今田舜年已故又具奏欲息其事如土司抗拒
不法則當發兵征剿若無罪當反坐原叅之人朕意以

二格所奏為是此事不便令督撫提督會審當再遣大臣前往尋

命大學士席哈納侍郎張廷樞蕭永藻察審田舜年僭越淫縱各款俱虛其希圖承襲等事屬實應治罪已死無庸議田昞如暴戾虐民抗不赴審已革職仍枷責安插內地向長庚隱匿田昞如降四級留任並以草率具奏革梅銷職總督石文晟及湖北巡撫劉殿衡偏沅巡撫趙申喬提督俞益謨各降級

罰俸有差四十六年六月陝西盜犯朱璽魏學吾
行劫商州雒南等處拒捕傷兵逃匿山澤千總趙
璉招降之

詔二格偕左都御史巢可托往勘朱璽等實因官兵四面
圍困計窮出降與自首不同論斬決從犯流徙寧
古塔被脅百餘人俱免罪承審官未能得實各分
別降革四十七年正月充

經筵講官初湖廣鎮筸紅苗劫靖疆營民為官兵捕

獲守備王應瑞訪知營民所在遣兵入寨欲援以
出苗民拘留之戕一卒總兵雷如私釋所獲苗民
易兵以歸事

聞二月

特命二格往訊得實苗犯廖老宰等俱梟示雷如照故縱
罪囚律革職枷責王應瑞擅動軍馬發邊充軍十
月遷禮部右侍郎五十年八月轉左雍正元年三
月卒

鄂海

鄂海滿洲鑲白旗人姓溫都由筆帖式授內閣中

書游陟宗人府郎中兼佐領康熙三十六年

聖祖仁皇帝親征噶爾丹鄂海先赴寧夏儲備牲畜

駕至寧夏會陝西按察使缺

命於軍營辦事之科道部郎內開列具奏

特簡鄂海任之

論曰初任外官者每於朕前奏言潔清其身以圖報恩及

蒞任後輒背其言朕於從官二十餘員內簡爾為按察使爾當益勵素行也三十七年遷陝西布政使四十年擢陝西巡撫四十二年十一月

上幸西安

閱兵以滿洲及綠旗兵皆善射鄂海與將軍博齊總督華

顯並

賜橐韃弓矢及

御書匾額貂皮冠服加一級十二月

詔

於河南府儲積米穀預備山西陝西賑貸並

命

督撫等會勘由黃河挽運事宜明年三月會勘三門底

柱溜急灘多舟行甚險應自河南府陸運至陝州

西太陽渡乃以舟運四月鄂海又奏勘閿渭河惟

自寶雞至郿縣一百四十餘里水落時重載難行

郿縣以東河深水平重船可以挽運疏下部議渭

河與山西之汾河河南之賈魯河並令巡撫設法

挑濬四十九年十月擢湖廣總督五十一年五月

疏言臣前赴鎮筵閱視邊界聞邊外紅苗恃強滋事雖經永順土司招撫並未納糧乃令總兵張谷貞辰州知府遲熅鳳凰營通判黃澍傳集苗目宣布

聖主威德令其改過輸誠於是毛都塘等五十二寨頭目開具八百餘戶丁口赴武昌投順八月又報盤塘窩等八十三寨投順頭目續至得

旨鎮筵生苗居深山之中自古以來並未向化鄂海等宣

示朝廷德澤布揚聲威盡行招撫殊屬可嘉在事官兵
交部議敘今紅苗等已輸誠削髮宜安插得所從容化
導教之禮義文武官弁其各仰體朕無分內外咸俾同
享昇平宇內無不樂業之意五十二年四月

上以鄂海曾任陝西才具素優兵民性情俱所熟悉調為
四川陝西總督十月疏言甘肅洮岷邊外大山生
番歸順得

旨洮岷邊外向無生番或係與外藩蒙古王貝勒貝子公

台吉等納糧之人不可止以投順為美名其事甚有關
係當再行詳察尋奏大山在洮州東南近土司楊汝松
界外非蒙古納進番人今既率屬歸化請即以楊
汝松管理又疏言四川建昌鎮屬會川營界外涼
山番目阿木咱率屬歸順願每歲貢馬四匹請給
職銜其所屬三千餘戶仍令管理五十三年正月
疏言去歲甘肅所屬靖遠固原會寧諸處夏田少
雨秋禾失收疊奉

恩諭全免五十三年錢糧又經撫臣岳拜請動倉糧賑卹
亦奉

旨允行已遵照籌辦外惟是甘肅山高地冷歲止一收民
無儲蓄其被災戶口或賑或借或糶三法並行災
民方得安堵且春夏間青黃不接小民謀食無由
宜乘春和時畊種若無籽粒牛具田畝坐荒秋收
又復無望請於被災等處乏食窮民自二月至六
月止日給糧大口三合小口二合以資養贍其有

田地而無力耕作者每畝給糧五升每頃給銀三兩以為籽本令所在道府等官確察妥辦諭令竭力耕種至流移未歸者臣與撫臣捐資齎送回籍後如屋宇傾壞令地方官捐修安插十一月以朝邑縣與山西蒲州接壤疏請將同州州同及潼關營千總移駐以資彈壓事並下部議行五十六年十月四川巡撫年羹堯勦撫越窩衛阿羊叛番奏繳土百戶印劄並奏把總皮登榜被射身死部臣

以所繳印劄未聲明西糾土百戶阿卡何往又皮
登榜被射情節前後所奏不符令鄂海確察尋奏
土百戶阿卡因大兵進勦畏懼潛逃已經招回西
糾至年羹堯前奏皮登榜督造浮橋中箭身死今
據提臣康泰等咨稱實係身先渡河奮擊叛番被
賊射斃乞

勅部議卹賞疏下部議令川撫酌行給賞五十七年大兵
征策旺喇布坦撫遠大將軍貝子允禔等率兵分

駐西寧甘州涼州莊浪豫備進勦鄂海奏撥西安
藩庫銀四十萬兩解赴甘省協濟糧芻又奏撥平
涼鞏昌寧夏貯倉米豆十萬石運赴蘭州充餉又
府谷山丹等州縣衛以軍行所過奉

旨免徵錢糧草束并請豁免一體運送軍需之陝屬葭州
甘屬寧夏等二十八處丁糧以紓民力五十八年
四月又言

皇上軫念西陲百姓轉運急公

特恩蠲免五十八年地丁銀兩以軍務未竣不及米豆草束第各省額徵類多折色惟甘省邊地銀數少而糧草多至平涼慶陽西寧涼州等府且有全徵本色者是沿邊軍需用力最多之地轉不得共沾實惠請將甘屬五十三四五六等年未完民欠銀糧草束一例蠲免使民盡力輸納本年額徵糧草以佐軍需則

皇仁溥而民氣裕疏下戶部寢其議奉

特旨盡予豁免五十九年五月固原提督金國政疏奏陝西兩年歉收百姓有流離狀

諭曰總督鄂海平昔居官亦優今因年老聲名漸不如前陝西兩年歉收之處並未詳悉上聞其令明白回奏鄂海尋奏西安等四府一州比歲豐稔惟延安沿邊堡所及甘肅涼州諸處歉收俱經題報所有五十七八兩年借給災黎銀米謹彙列實數陳奏疏入

報聞六十年五月

命鄂海辦理軍前糧餉而以四川巡撫年羹堯代為總督

十月疏言遵

旨至甘州料理糧餉甘州等處山多田少所產糧草有限
宜豫為籌備請于河南湖廣運至陝西糧餉內撥
米六萬石豌豆四萬石半送甘州半送涼州從之
十二月

諭議政大臣曰吐魯番現駐官兵其可種之地甚多總督
鄂海在軍營無事可即往彼効力六十年六月靖逆

將軍富寧安請派大臣專司吐魯番種地積糧

上命鄂海同副都統克什圖管理遇有軍務一體調遣

世宗憲皇帝雍正元年十月以原品休致仍在吐魯番種地効力三年四月卒

福敏

福敏滿洲鑲白旗人姓富察康熙三十六年進士
改庶吉士散館歸班

世宗憲皇帝在藩邸時

今上初就外傳福敏侍讀康熙六十一年十一月

世宗憲皇帝御極擢授內閣學士兼禮部侍郎尋充

經筵講官雍正二年八月充會試副考官十一月充

繙譯鄉試副考官十二月教習庶吉士三年四月

遷吏部右侍郎六月疏言漢官陞任級非隨帶者

例改紀錄滿官則一槩銷去請照漢官例畫一下

部議行八月署浙江巡撫十二月疏言海塘工程

原議皆用條石後因限迫遂用條石托外亂石填

中恐日久坍塌請寬限照原議改築得

旨交新任巡撫李衛查勘修理時

命都統拉錫至浙查抄年羹堯財產羹堯先已自燬書札
福敏於拉錫回程後復查出西征隨筆逆書二冊
係錢塘舉人汪景祺撰

上嘉其細心論景祺罪如律四年二月擢都察院左都御
史四月管翰林院掌院學士九月署湖廣總督十
月奏沔陽潛江等十州縣水災請暫借常平倉穀

六萬石發賑續將贏餘銀買補又奏被水各州縣
現遵

旨煮賑但老幼頗難就食丁壯亦覺路遠時當種麥恐妨
生業請查丁口一體給米均得

旨嘉獎十二月

諭曰朕原命爾暫署督篆若一得人即命往替近日廊廟
中頗乏卿貳滿臣皇子左右亦需爾來輔翼留爾在楚
乃出於不得已宜體朕意勉力為之五年正月疏言湖

廣苗徭地方不產硝磺而多鎗礮傷人案明係私
販轉入查革職藩司張聖弼濫給硝磺牌照甚多
前任藩司鄭任鑰亦縱戚林西周販賣射利應嚴
禁得

旨硝磺乃違禁之物湖廣苗徭雜處例禁更嚴鄭任鑰縱
其私人犯禁取利著革職在楚修理江岸工程處効力
贖罪二月奏請以耗羨銀兩築江陵松滋等縣堤岸奉
旨著動帑金委員監修成後仍算民堤百姓加意保護俾

永受其益四月謬冲花苗叛福敏檄黔兵截後路以楚
兵搗巢平之下部議叙加二級七月疏言安陸荊
州各府被水堤塍冬初水退正可興工除被災老
幼婦女照常賑濟外丁壯悉令修築優給賑米俾
饑民得食而堤亦完固

上善其議如所請九月奏請增設湖北糧道庫大使一裁
蒲圻縣羊樓司巡檢從之先是閏三月

召福敏回至是得代進京授吏部尚書六年四月以前巡

撫浙江時瞻徇布政使佟吉圖擅動庫銀事革職

八年四月

命協理兵部侍郎五月兼戶部侍郎九年擢左都御史仍
兼戶兵二部事十年七月署工部尚書

特命協辦大學士事十一年十一月署刑部尚書十二年

五月以審理戶部尚書彭維新一案朦混徇隱奉

旨申飭又議福建武平縣民藍厚正毆死胞兄擬斬留養

一案糊塗姑息降三級留任乾隆元年五月

命同左都御史孫嘉淦辦廢員案嘉淦劾福敏偏執

上以福敏既拘執嘉淦亦沽名另派大臣辦理八月充
順天鄉試正考官二年三月充會試正考官六月
教習庶吉士三年正月擢

武英殿大學士兼工部尚書二月充繙譯鄉試正考
官十一月兼翰林院掌院學士四年五月加太保
六月八旗通志告竣加二級六年七月

上初幸木蘭行圍福敏奏事宜六條一行圍邊外內外

奏章按期馳送較

宮廷清穆勞逸懸殊尤宜朝乾夕惕清明在躬從容
應之一留京百官道在隨事警察因人懲戒不使
偷惰者得行其私一巡行之日言路不可不闢然
有大奸惡大利害宜叅奏不當瑣細瀆陳傷政體
一

聖祖仁皇帝於獵地之平易險阻莫不了然故周旋中度
馳射如神願

皇上籌度於馳射之先一弁兵布圍未必無叅差乞少
加從容使未習後生得通勉從事一弁兵從行日
久必致資斧不濟量加

恩澤費無多而受惠無窮得

旨覽大學士所奏具見老成忠懇補袞陳善之意朕皆
嘉納七年福敏年七十

御製詩賜之曰前世文昌宿當朝王者師典型鵷鷺序
標準鳳凰池有問鳴鐘應方瞻霽月披耆年緣令德

初度值良時堂敞槐陰茂筵開日影遲春風坐綺席
仙酒介龐眉允賴經綸手猶踈弟子儀壽身兼壽世
長佐太平基八年七月奏時政三條一河防事宜動
關呼吸難容濡遲江南石林口等處新工初就愈
宜保護懇照災民請賑例一面辦理一面奏

聞一災民勢必流移自謀生活若有司不善拊循但禁
越境致輾轉溝壑宜加以玩視罪一江南湖廣等
處偏災請留六省南漕賑濟懇

宸斷數目截留庶上不虧儲下足濟食奏入報

聞十年十二月以疾請解任

諭曰卿才品優長老成端諒內廷講誦多年恪慎小心
實有裨益特簡綸扉正加眷倚覽奏情詞懇切朕勉
從所請著解任調理加銜太傅以示篤念舊學之意
卿善自頤養以承恩澤遇精神康健風日晴和仍舊
詣宮門請安並到內廷書房看視十二年

上以詩存問曰經時未到禁門邊食履多宜心泰然月

霽風清煩暑遠忽教重憶講帷前十七年福敏年八

十

御製詩賜之曰光霽由來衆式觀絳帷黃閣領儒冠身
名應擬濟南伏年德原同沛下桓松鶴作朋還侑酒
孫曾繞膝合加餐還丹益算何須藉兩字傳經永不
刊二十一年十月卒

諭曰致仕大學士福敏品行端嚴學問醇正老成耆碩
宣力年深久侍講帷清勤懋著予告以來朕時加存

問前歲抱疴曾經親往看視賜以醫藥調養就痊方
謂精神康健期頤可望今聞溘逝實深軫悼即日朕
親行致奠著賞內庫銀一千兩經理喪事所有應得
卹典著該部察例具奏尋

賜祭葬謚文端入祀賢良祠四十四年

御製懷舊詩稱為龍翰福先生

詩曰今古既殊宜其教亦異施古方教數年今為出閣
時憶半舞勺歲

皇考掄賢師即從師授經詎惟習少儀循循既善誘嚴若
秋霜披背誦自幼敏匪曰詡徇齊日課每速畢師留
為之辭以此倍多讀胥益平生資誰知童時怨翻引
老日悲不失赤子心能無繾綣思嗚呼於先生吾得
學之基

欽定八旗通志卷一百六十九

欽定四庫全書

欽定八旗通志卷一百七十

人物志五十

大臣傳三十六

滿洲鑲白旗四
文綬 珠魯訥

查郎阿 三和
五福 莽喀察

查郎阿

查郎阿滿洲鑲白旗人姓納喇曾祖章泰以軍功
授雲騎尉尉祖查爾海復以軍功晉襲一等輕車都
尉父色思特由護軍從征噶爾丹於烏蘭布通陣

歿入祀昭忠祠查郎阿初襲世職兼佐領康熙六十年授叅領雍正元年授吏部郎中二年

特擢吏部左侍郎三年二月署鑲黃旗滿洲都統七月疏言直隸州州同州判向用捐納貢監恐不足統所屬科甲出身之知縣請將舉人及恩拔副貢補用下部議行五年四月遷左都御史仍辦吏部事十一月西藏噶卜倫阿爾布巴等戕總理藏務貝子康濟鵒北薩克台吉頗羅萬以

聞

命查郎阿偕副都統邁祿率兵進藏六年四月授吏部尚書九月奏言臣等五月自西寧出口八月抵藏駐藏副都統瑪喇學士僧格及頗羅鼐已擒阿爾布巴即會同鞠實誅之餘黨悉抵法十一月又奏藏事已定達賴喇嘛移居裏塘臣遵

旨留陝西四川兵各千交駐藏大臣調遣報

聞十二月奏言頗羅鼐為唐古忒衆信服請令總理後藏

事務其前藏據頗羅鵠舉二人一色珠特色布騰
一策凌旺扎爾俱授噶卜倫但新任恐未妥協前
後藏不遠暫令頗羅鵠兼管俟達賴喇嘛移居畢
詔地兵撤頗羅鵠仍專管後藏

允之七年二月奉

旨查郎阿自藏回到西安協同川陝總督岳鍾琪辦理軍
需不必來京四月署川陝總督八月奏改西安管糧通
判為水利通判移駐涇陽縣之王橋鎮專管涇陽

醴泉三原高陵臨潼五縣隄渠從之十月兼理西
安將軍印務加太子少保尋奏安西沙州等處屯
民豐收恐口內國戶乘機興販射利宜嚴查禁並
諭屯民存一年所需餘即糶諸本地以濟兵民食
用

諭曰禁止奸徒射利辦理甚是但民戶餘穀只許在本地
糶賣尚未妥協朕思民戶盈餘之穀原期糶賣以為日
用之資若本地糶穀者少則出糶未免艱難不可不為

計及著該地方官酌量情形動支官銀照時價糴儲備用毋得勒賣滋擾十二月奏言肅州近嘉峪關兵馬出口頓宿米豆草價俱昂肅鎮兵餉本色少折色多不敷糴買請量增從之八年十月

命往肅州辦理軍需仍兼川陝總督九年二月增設四川總督查郎阿改署陝西總督四月奏言大學士瑪爾賽等因岳鍾琪撥駐肅兵四千出口恐肅州兵單議將撥到甘涼之滿洲蒙古兵暫移駐肅俟山

西綠旗兵千五百並附近肅州之提鎮標兵三千
五百派調到肅再將滿洲蒙古兵移駐安西業奉
俞旨臣查肅州附近標營止有甘涼二州甘州提標兵除
派撥外止存千五百其餘新募軍裝馬匹未齊涼
州鎮標兵除派撥外僅足以供汛守不便再撥肅
州現駐寧夏涼州固原兵千五百又調山西兵千
五百合鎮標兵六千餘又寧夏滿洲兵一千統計
萬餘足資彈壓不必移應駐安西之滿洲蒙古兵

亦無庸再派五月又奏言奉

旨於湖廣買米循舊道運貯商州以備轉運臣查大學士等原議自襄陽至龍駒寨運價及造船濬河每石費銀一兩龍駒寨至安西每石二兩較安西米價已逾數倍商州處萬山中丹江環之地氣潮濕商南雒南等縣環山濱河亦難久貯陝西各屬存糧百二十餘萬石更有扣存五分社倉銀經督臣岳鍾琪奏明存庫未糴請動此項於新穀豐收時酌

量採買分貯州縣可省運費而散貯各處每年出
陳易新亦易均如所請十月準噶爾賊犯阿濟卡
倫蒙古游牧被掠

勅查郎阿安輯之十年七月

諭曰西路軍營事務岳鍾琪辦理總不妥協著回京署陝
西總督查郎阿年來辦理軍務事事合宜克勝大將軍
之任著署寧遠大將軍印務但肅州路遠未便來京請
訓今特命大學士鄂爾泰馳驛前往肅州傳朕訓諭並

賞銀一萬兩十一年四月疏劾駐防庚集副將紀成斌
駐防烏克克嶺總兵張元佐漫無偵察致賊刼糧
車逃得

旨紀成斌在軍營正法張元佐降三級調用八月奏報庫
爾墨圖山賊五十餘來犯我兵擊斬二十餘人餘
俱生擒無一脫者

上諭獎之九月條奏禁止逃兵四事一律載官軍從征私
逃初犯再犯及知情藏匿俱分別治罪誠恐蠢愚

悞罹重典請令該管大臣飭將領頭目等明白曉諭俾知凜遵一自將領至什長旗俱有管兵之責嗣後兵逃什長旗即日報明查緝逾限及徇隱者罪之如一營內一月報逃二名以上逾限不獲該管分別治罪一逃兵自悔投到無論初犯再犯俱免罪入伍總以文到一月為期許於所在赴官投首轉押回營逾限自首者減二等治罪仍准入伍自首復逃獲即正法一逃兵必經汛卡汛兵能查

獲者視離營遠近酌賞官弁記功如別經拿獲各
汛卡失察弁兵分別議處治罪軍機大臣議如所
請尋疏劾總兵曹勦奉派駐防哈密縱賊捏報奉
旨即在軍營正法十月奏言冬令雪深應分大兵駐守臣
酌令副將軍張廣泗駐北山常賚駐南山臣與叅
贊穆克登等留駐大營仍不時親往南北兩路巡
察並派總兵張朝良等分防要隘

允之先是查郎阿疏劾副都統阿克山觀音保所管馬倒

斃走失有心玩誤部議即在軍營正法十二年三月查郎阿奏阿克山觀音保所屬兵久居南方不知收法較退縮竊換者微別請暫停正法在軍營通衢枷號

詔徧諭軍營將士示警五月

諭同北路定邊副將軍策凌來京會議軍務九月張廣泗奏大敗賊於鄂隆吉大坂俘斬甚衆

命議叙在事將弁並

諭曰署大將軍查郎阿雖奉調遣來京然自統兵以來與張廣泗同心協力整飭戎行鼓勵士氣此番克捷亦由平日訓練整頓之所致著一併從優議叙十三年五月噶爾丹策凌乞和查郎阿遵

旨以次撤大兵還六月奏西路駐防事宜一邊界定後廷議留兵於巴里坤二千哈密二千查巴里坤隘口處處可行二千兵盡數撥防亦不足用至哈密二千屯田則不敷巡防則難徧且兩處中隔南山大

坂呼應未便與其分駐兩地不若合駐山南請增
兵一千合為五千哈密實駐三千其西三堡沙東
泉東北塔勒納沁並有城堡各駐一千聯絡方嚴
密一哈密夏熟軍營馬駝應每年草肥之時撥兵
二千携至山北呼濟爾台沙山子鹿心山等處牧
放增斥堠防守秋深仍回山南一南山大坂為哈密
北面屏障烏克嶺為三堡沙東泉要隘塔勒納
沁河源為塔勒納沁要口應分設斥堠撥兵瞭望

一哈密貯糧充足且有蔡巴什達里雅屯田可供
三處兵糧無庸輓運一留駐巴里坤兵已閱七載
應悉撤預選安西瓜州兵四千俟巴里坤兵撤回
即令大員領赴哈密駐防以均勞逸得

旨允行又條奏六事一巴里坤兵撤後廷議於安西增提
鎮各一兵萬攜眷駐防聲援哈密查兵萬需糧十
萬安西屯糧不敷城堡營房事事須籌不若於甘
省提督肅州涼州西寧安西四鎮各撥兵一千更

番迭戍無庸於安西增兵一撥陝西督標兵千固
原提標及各協千五百延綏千寧夏千河州五
百合五千在赤金靖逆柳溝布隆吉爾橋灣五處
駐防附近俱有牧場一赤金等五處兵期以二年全
行更代哈密兵年更一半其半熟練即可教習一
半新兵一哈密及赤金等處兵五千應以總兵二
員副將二員統領分轄赤金等處總兵副將於兵
丁更代時俱更哈密總兵副將令一年更代庶屯

田斥堠有新舊大員相間管領一哈密兵屯種收
獲足供口糧其各衛所官屯田畝應悉與安西鎮
標營兵丁屯種如再不敷照例折給一肅鎮臨邊
請增城守一營設都司千總各一把總二撥步兵
二百專司城守汛防廷議如所請行並議再令提
督一員駐哈密節制兩鎮居中調度從之先是

上軫念從征將弁

勅陝西等省現出各缺十中分三陞補出征之員至是西

路兵撤凡陞補他省者應各赴新任查郎阿奏言
陞補中陝甘人員隨征年久今甫回籍又遠赴新
任或無力携眷同往留又無人養贍請將現在軍
營陞補直隸等省之千把總留陝甘各營遇缺挨補
上以候缺需時令現任千把總未出征者開缺以留陝人
員補用七月授大學士仍管總督

諭曰西路官兵前因岳鍾琪調度失宜諸事廢弛遂致軍
氣不揚士心不振自雍正十年查郎阿統兵以來與張

廣泗同心協力事事整頓時時訓練凡行間將士俱知
奮勇効力營伍為之改觀所以十一年十二年賊人兩
次侵犯卡倫俱為我兵擒勦未令免脫且賊人因我軍
嚴整畏憚懼服從前狡獪伎倆不敢復逞此皆查郎阿
辦理妥協之所致今大兵撤回查郎阿張廣泗俱著交
部從優議叙尋議加三級八月

命為文華殿大學士兼兵部尚書是年仍改陝西總督為
川陝總督乾隆元年三月奏言巴里坤兵現遵

旨撤還內有勇健營千一百名係新設別無營汛撤回
難於部署且係十五省所選伎勇離家日久聚處
恐不相宜請各歸本省發督撫提鎮隨標入伍効
力不願者聽

上報可初查郎阿以甘肅地瘠請酌撥陝西倉儲預籌
協濟以裕民食

詔會同陝西巡撫劉於義確議五月會奏協濟六事一原
奏撥陝糧六萬石以四萬濟平涼二萬濟慶陽今

固原等處缺雨請增撥二萬石俟麥秋後陸續撥
運照軍需例給價一撥糧原按西安十二州縣倉
貯多寡勻派咸寧長安各三千石涇陽醴泉興平
各六千石乾州七千石咸陽五千石永壽四千石
富平三原各六千五百石高陵藍田各三千五百
石合六萬石今增撥二萬應於附近各屬酌撥一
糧由北路運往若逐站轉運則富平等縣止數十
里總匯於乾州永壽等處接運勞逸不均應令各

州縣直送各處交收一原奏所運糧分駐涇州長武
查長武屬陝西涇州距慶陽各屬尚遠今議以二
萬石由涇陽九條溝直運慶陽其餘六萬石仍運
至涇州分別接運勻貯再會寧安定靜遠三縣山
田歉收附近無可協濟應於運涇糧內在靜寧固
原二州多貯數千石以備三縣不時之需一口袋
舊存十四萬五千條或雙套或修補即可備用至
慶陽涇州即留備接濟分運仍按數收貯一甘民

素無蓋藏平慶尤甚豐年盡糶所有則價頓減稍
歉則價頓昂請嗣後遇豐年隨時採買積貯民免
熟荒之累得

旨妥協之至著照所議行六月疏劾原任甘肅巡撫許
容匿災殃民營私樹黨各款

命革職拿解來京部擬杖徒援免八月奏陝甘標營生
息銀兩五事一營運之宜變通也各營兵借債輸
利貧無底止欲除私借須開官借之條凡兵丁急

需許呈明該管千把總轉報查實係無力即以生
息銀會同地方官借給每兵不得過五兩一分起息
於應領餉銀內分五季扣除扣完仍准借給一生
息之宜因地也地方有豐嗇生息亦應有重輕延
綏鎮協地處極邊當商領運應照例一分起息此
外量為輕減一本銀之宜畫一也生息銀兩原係
惠濟兵丁向止議及督撫提鎮各標營而各協營
路未及應照雲貴例每兵一名給銀二兩營運生

息以乾隆二年為始按各標營協路兵數均給一
收放之宜慎重也營中收貯經理恐不免私弊請
交地方官貯庫聯銜動支該管大員不時盤查如
通同徇隱及失於覺察照例議處賠補一賞卹之
宜酌量也各營生息既難賞銀宜量入為出應先
儘現派駐防哈密赤靖等處兵萬名酌定其家遇
喪事賞銀六兩吉事賞銀四兩存營兵照防兵減
半又奏言口外大通地方既設營汛流移蒙古不

便容留原有該管之扎薩克即交收管否即查附近各部落分別安置如已立產地方官估價給令另置無則查按戶口給半再違例容留者兵民治罪衛營官失察議處

詔均如所請行九月來京

陞見

諭速回西安十一月奏言陝省屯更之賦重於民田昔年糧從地起丁由人出故屯更賦重而丁銀稍輕

經前督臣岳鍾琪奏將通省丁銀攤入地糧屯更
地每畝一石折銀一兩均載丁銀一錢五分糧輕
丁重民戶減除甚多糧重丁輕者有增無減請照
前奉

恩旨豁除俟下屆編審將通省新增應完之丁銀均攤
於民戶地糧漸補足原額即行停止永不加賦則
以糧載丁之案不必紛更而屯累稍紓再查陝省
馬步俱係招兵食餉獨督標火器營兵一千於咸

長等州縣屯丁內拔補每名月給餉銀七錢餘皆
屯民津貼或本人當兵合衛代完錢糧或出銀僱
人其人稍不遂意逃避勒捐又向本衛拔補滋擾
無已請照鎮標步兵例招募差操不在屯衛拔補
庶各縣屯民永免幫貼之累又言屯衛地丁久歸
州縣初時恐公務浩繁應役需人將屯丁留用二
千每丁受旱地一頃將額徵米二石二斗豆一石
八斗布銀四錢二分留為應役工食近來差務漸

減各衙門皆有經制人役且一丁受地一頃終歲
服役不遑盡力農畝俯仰何賴更有本身不能應
役僱人代替亦有各衙門不用供役勒折軍錢弊
難枚舉請將屯丁二千裁留一千各衙門少一千
屯軍卽州縣多一千農夫錢糧歸於有用屯田亦
稍甦其留丁一千工食外再給銀二兩計共銀二
千兩在司庫按季支領均從之先是查郎阿奏銷
軍營節年倒斃及竊失馬駝過多經戶部駁令賠

補二年十月奏言軍營調度在大將軍果指示得
宜何至牲畜被竊所有雍正八九十年巴里坤
被竊馬駝應責岳鍾琪賠補十一年五月柏楊溝
被竊馬駝責臣賠補惟雍正九年鄂爾多斯牧廠
走失馬駝仰祈

聖主念該部落隨征數年尚屬奉公副將馬順暨滿洲驍
勇等營官兵亦頗著勤勞均准免賠至節年倒斃
馬駝因從內地出口跋涉數千里軍營氣寒耕作

馳驟筋骨俱傷是以更多懇

恩軫末弁窮兵免其賠補

上特允之三年三月疏叅肅州道黃文煒軍需道沈青
崖庫官石曰璉營私侵帑請革審劉於義總理軍
需縱容徇庇併附叅

上命左都御史馬爾泰等會鞠得實治罪如律五月奏
言涼州莊浪建滿城並衙署營房原估銀五十二
萬八千六百餘兩緣募附近番土民人用工少而

得力多節省銀二十二萬三千有奇臣查閱邊地
見肅州涼州城垣坍塌平番大通河橋梁被衝請
撥三萬六千兩興修從之又言章嘉呼圖克圖
奏請以裏塘巴塘等地方賞給達賴喇嘛經議政
大臣等令臣悉心籌畫咨商雲貴總督慶復妥議
臣查達賴喇嘛為番夷各部落所尊崇

聖祖仁皇帝時克西藏設床加封駐兵戍守洵安邊至計
然由滇蜀至西藏途遠勢隔是以將裏塘巴塘等

處收歸內地以利糧運雍正三年將察木多以內
各處頭人給土司職銜為打箭爐保障察木多以
外給達賴喇嘛每年又賞達賴喇嘛茶五千斤班
禪額爾德尼茶二千五百斤加恩已渥今若再賞
裏塘巴塘令番衆赴藏納差將來駐藏兵撤倘有
叵測打箭爐外沿途不無阻梗惟是藏中大小寺
廟千餘所常住喇嘛四十餘萬用度浩繁今章嘉
呼圖克圖亦止因日用不敷起見請照裏塘巴塘

等處每歲所納數目在打箭爐商稅銀內按數賞
給於每年達賴喇嘛差人領茶之便給令帶回其
地仍隸內地奏入

上嘉納之十二月奏言寧夏地震臣聞報即携銀馳往
撫綏被災兵民又撥固原兵六百協勘巡防得

旨嘉獎四年三月奏言督標四圍空地及收回將材等
項地畝計十八頃有奇前督臣岳鍾琪奏准招佃
收租借給乏食兵丁照社倉例加二起息還倉以

備補造器械比年因雨澤愆期積欠二千餘石請
准豁免並請嗣後查實在乏食兵丁准將所借照
市價於月餉內陸續扣還免其加息報

聞五年四月

命還京入閣辦事五月加太子太保七月

御製詩賜之

詩曰玉陞資調燮西陲運計籌持鈞推舊德補袞著嘉
猷可繼蕭曹業還同韓范儔江湖與廊廟莫釋一心

憂六年奉

命偕侍郎阿里袞清查黑龍江吉林烏喇等處開墾地畝事竣還京十二年三月因哀病乞休

命以原官致仕九月卒子邁拉遜襲世職

三和

三和滿洲鑲白旗人姓納喇雍正二年由護軍校授三等侍衛初三和曾叔祖拜庫達以軍功授二等輕車都尉卒兄子瑪察襲卒子瑪爾泰襲四年

三和降襲騎都尉乾隆元年四月授二等侍衛五年晉一等侍衛六年三月授總管內務府大臣六月署戶部侍郎七年實授八年十月管理奉宸苑事十二月疏言親蚕典禮與親耕並重前代制度未備

皇上勅建先蚕壇為曠世鉅儀請將建造壇址宮殿規制及興工告成日期

宣付史館以光盛典從之十年正月

命赴甘肅會同巡撫黃廷桂勘估應修城堡邊牆六月疏
言自寧夏抵甘涼肅沿邊二千九百餘里土牆多
坍塌損我

皇上保又邊祇原不惜百萬帑金為鞏固藩籬計但一
時並舉工費實屬不貲且城垣為兵民依賴現所
議修邊牆似可稍緩至通省應修城垣須先其所
急後其所緩查肅州鎮屬金塔協在極邊外甘州
府為五涼扼塞蘭州府屬之河州狄道州或控制

邊口或水患衝刷請即動項興修至平涼府固原
州古浪縣三城應次急其餘殘缺城堡需工料千
兩以內者飭地方官動公項按年修理千兩以外
委道府確估報部修補部議如所請尋

諭就近會勘陝西各屬城工奏言榆林府屬之榆林府
谷神木三縣延安府屬之定邊縣逼近邊牆鄜州
安塞縣二城為水所衝均應急修靖邊延川米脂
華陰咸陽等二十州縣陸續遞修從之十一月調

工部侍郎十三年五月因辦理

孝賢皇后冊寶不慎議革職得

旨從寬留任十月調戶部侍郎十四年四月晉工部尚書兼議政大臣十二月

諭曰三和自補授尚書以來事事周章不能妥協今御門聽政伊又遲悞不到乃器小易盈不足勝任著以工部侍郎用衆佛保不識漢字不必辦理部務其員缺即著三和補授十五年九月以私伐木植一案掩

飾回護部議革任得

古從寬留任註冊十月工科給事中珠章阿疏叅工部

承修

天壇內外圍牆銷冊與原奏不符且多碎磚包砌

詔下工部堂官明白回奏三和等奏言壇內三座門東西舊牆明嘉靖年所造俱三順一丁成砌今所修圍牆與舊相連是以內圍四面外圍東西南三面照舊成造其外圍北面去內圍遠不見舊式隨

一順一丁成砌查城磚一塊之長與二塊之濶相等圍牆止二進則三順一丁與一順一丁工料相同再圍牆共三千二百餘丈包砌二層奏准裏用舊磚砌完再用新磚並非私用舊磚冒銷新磚價值諭曰此奏殊屬支吾三和委辦工務尤其專責乃既已蹈過又復飾非著交部嚴加議處部議革任得

旨從寬留任十七年二月調戶部侍郎四月與海望等遵旨查奏

兩郊壇宇工程所發物料銀過多自請議處革任註冊十八年仍調工部侍郎時銅山河堤決尚書舒赫德等奏開引河

命三和率通曉測量之員馳赴工次測視二十三年以承辦塔工拆裂部議革任得

旨永遠停俸三十二年

上以三和行走多年年已七旬授內大臣尋

命紫禁城內騎馬三十八年卒

諭曰內大臣工部侍郎三和宣力有年恪勤匪懈昨冬
因患病請假隨命御醫診視時復遣使存問今夏特
賞給人參俾得從容調攝以冀就痊忽聞溘逝深為
軫惜著賞銀五百兩料理喪事其任內革職降級之
案准其開復凡有一切應賠應繳各項著加恩概行
寬免應得卹典該部察例具奏尋

賜祭葬如例謚誠毅子蘇第察襲世職

文綬

文綬滿洲鑲白旗人姓富察雍正十三年由監生授內閣中書乾隆七年遷禮部主事十年遷員外郎尋改內閣侍讀十一年授甘肅涼州府知府十四年遷安西道十五年調西寧道十六年調肅州道十八年仍授安西道二十五年遷甘肅按察使二十七年擢山西布政使三十一年以迎合巡撫和其采容隱陽曲知縣段成功虧空革職發軍臺効力三十二年六月給道員銜往哈密辦事三十

三年十二月授河南巡撫未抵任調陝西巡撫三十五年二月奏洛川縣每年額徵民糧米麥荳三色共二千六百餘石以供兵糈除每年額支兵糧千四百餘石尚餘千二百餘石積至乾隆三十四年現餘糧萬八千餘石縣倉不敷存貯請以一萬五千餘石為額餘糧隨時出糶報部充餉得旨允行五月吏部奏前奉

諭令督撫查奏學政有無置備食用州縣繳價之事文

綏推諉不奏應革職

詔從寬留任三十六年五月署陝甘總督七月

命赴齋爾賞賚投誠之土爾扈特九月授四川總督十

月調陝甘總督十二月奏官兵進剿金川陝甘共

派兵三千延綏鎮總兵書明阿現帶一千徑赴維

州其西寧兵一千陝西兵一千請以興漢總兵張

大經統領赴川興漢毘連川省進征尤便臣親往

鞏昌安定照料起程

上嘉之三十七年正月疏言巴里坤烏魯木齊年來買
易傭工民人甚多富者可雇工承墾地畝貧者每
戶給三十畝並農具籽種照新疆例六年陞科並
指明地名往墾瑪納斯城南可墾二萬餘畝瑚圖
壁城西北可墾六千餘畝巴里坤城外及西大墩
大泉并東西石人子沙子奎蘇可墾五千九百餘
畝玉門淵泉敦煌三縣雖土性鹼鬆近得渠水灌
溉可添墾田五千餘畝舊例嘉峪關口常閉經過

者驗照放行不免守候稽延今關外久成內地請
飭文武官將嘉峪關辰開酉閉進者仍行盤詰出
者聽其前往無於烏魯木齊城南七達色巴山梁
開寬大路以便前行赴墾戶口日增行旅亦為有
益部議從之五月酌定收捐監糧章程一肅州高
臺縣每監一名捐糧五十石淵泉玉門敦煌三縣
每監一名捐糧四十石哈密巴里坤烏魯木齊特
納格爾吉木薩奇台昌吉木壘八處悉照安西糧

數報捐一收捐俱以豌豆小麥交納一令經收之
員印給實收一修造監倉應借項酌建俟收捐費
歸款一收糧數多應出易以免紅朽一報捐應具
結以本色交倉一交倉應隨時申報以杜包收折
色一造廩口冊應申報盤查以防虧欠挪移奏入
軍機大臣議行又籌備巴里坤移駐滿洲兵糧料
事宜一古城可墾地三千畝泉水足用請撥肅州
鎮兵百五十以千把總一員統往耕作一古城吉

布庫奇台歲收及陳存糧籌給巴里坤滿洲兵餉
應將甘肅提標西寧涼州鎮標孳生駝挑至吉布
庫古城奇台擇廠收放再派滿洲兵護送一巴里
坤奇台存糧十餘萬石每年僅用舊糧萬石未免
壅滯應將巴里坤滿洲歲支糧料四萬餘石先就
舊糧支給其新收歸倉者許遞年出陳易新一馬
草應支給價銀聽官兵自辦

上獎其所奏詳妥六月奏西安滿洲兵移駐巴里坤例

將所領製裝銀兩扣留一半與兵丁置貨帶往出售以資生計查巴里坤水草豐美可以放牧及天氣嚴寒老幼非皮衣無以禦冬請於巴里坤山灣設孳生牧廠將滿洲兵扣存製裝銀兩給令多買羊隻雇人牧放并令旗下閑散子弟一同學習取乳剪毛以廣生計并使熟於口外情形各歸儉樸得

旨嘉獎十一月奏暫開捐納以裕軍需

上切責之四川前任總督阿爾泰縱子明德布勒索屬員

命文綬密行查訪尋奏言明德布因在署辦事與屬員漸熟往往進見於是人言嘖嘖雖勒索等事尚無指實而阿爾泰縱子干預公事情弊顯然時軍機大臣等鞠明德布具服

諭曰文綬係棄瑕錄用之人其在陝西巡撫任內辦事尚屬認真加恩擢授總督又於軍需向所諳習特調

為四川總督令其整頓經理乃伊聞命之初尚似勇往及到任以後一切軍營事宜未見其實心妥辦甚至借軍需名目妄請開捐竟為屬員冒銷地步初不意其乖張若此至聞阿爾泰在川聲名平常並有縱伊長子明德布向屬員勒索之事因傳諭密訪文綬覆奏不過就旨敷衍事無指實若僅以人言嘖嘖為憑何足以服阿爾泰父子之心朕從不肯以風聞無據之言輕治臣下之罪復諭文綬於該省屬員內設

法查訪不得仍事含糊乃閱數月之久並未查明續
奏明德布現在京候訊即命軍機大臣會同內務府
大臣詳加研鞫據明德布親供俱已直認不諱文綬
身為總督奉旨密查應實力訪察據實覆奏方不失
為大臣秉公持正之道乃竟意存袒徇輒敢蹈官官
相護之惡習實出情理之外後任督撫訪查前任之
事無難水落石出似此肆行欺罔於吏治人心大有
關係若皆從而效尤朕將何以任人是文綬之罪斷

難復寔著革職發往伊犁令其自備資斧効力贖罪

三十八年六月

諭曰文綬去年獲罪之由係沾染外省袒護惡習尚無大罪在當時不得不加以創懲念其向來頗能辦事尚可棄瑕錄用著加恩補授湖廣總督仍署理四川總督八月偕富勒渾疏言現在添兵進勦需糧倍增於昔請照乾隆十三年范毓麟王堂助餉加銜之例令各省商民有願赴川運糧者均准赴川報到准

其辦運咨明該省其所辦之糧軍需局查明應運何路即指定給照定限運交仍飭知該站隨到隨收并給實收聽自行賚部請叙九月又奏酌定納粟章程請每穀一石價銀九錢俊秀捐監例捐銀一百八兩應納穀一百二十石其捐貢及捐各項職銜應納穀數准計核收使捐穀之費與捐銀之數相當並議行四十一年二月實授四川總督四
十三年十二月偕特成額明亮合奏兩金川新收

屯糧請照打箭爐舊例凡存貯及本屯支放每石
准耗五合如撥運別屯准耗一升不准按年加耗
從之四十四年十一月入

覲

上以其子山東巡撫國泰睽隔多年

諭令來京相見四十五年二月

京察加一級六月奏稱四川素產井鹽界連滇省自

雍正七年至乾隆三年以滇鹽不敷民食先後題

定令昭定東川鎮雄宣威霑益平彝南寧等屬改
食川鹽川商承領邊引撥配犍為廠鹽由興文長
寧屏山高珙等縣運至交界並以道險費重經滇
省開修河道令辦銅回船接運川鹽乃得暢行滇
民始免食澹迨後水路開通商民情熟或以川地
計口之鹽撓雜混銷或於行滇引鹽之內夾帶偷
賣因利乘便積少成多原非如連車盈艦梟販公
行查拿轉易從前屢經兩省咨會在川滇交界之

張灘及洪縣之羅星渡興文之梅嶺鎮為行鹽入滇
總匯又於滇省昭通之富官村小腦塘大關廳之
鹽井渡鎮雄州之落垓塘羅坎關等處按數核對
接銷立法非不周備然地方官稍不經心仍不免
偷漏影射之弊誠所謂有治人無治法也茲悉心
籌酌專委幹員於川滇交界各隘口會同該地方
文武設立卡隘分路稽查務使私販絕迹引運肅
清如各委員及地方官怠玩因循虛應故事即行

分別撤回叅處其川滇連界者一併加意稽查

上是之並

諭雲貴總督福康安曰文綬所辦甚是川滇地界毗連
宜一律嚴防方有裨益四十六年三月

詔停打箭爐收稅部員由總督委員管理文綬條奏裁
改事宜一徵收稅務即委打箭爐同知專管一報稅
簿由布政使印發按月登記備查照簿造銷核題
一魚管稅務費用較繁除同知本任應得養廉再

增給三百兩為管稅養廉其紙張公費及額設通事譯字書巡等役均仍舊解部飯銀應由司庫搭解下部議行閏五月以題銷商運軍糧腳費前後矛盾不自引咎戶部奏請降二級調用

詔改為革職留任先是四川無籍遊民糾衆劫掠土人呼為囑匪漸闖入湖廣貴州界湖廣總督舒常湖南巡撫劉墉貴州巡撫李本俱以捕獲囑匪入奏七月文綬疏言合州界連太平東鄉開縣等處聞

有嘯匪三十餘人持仗拒捕即飭令鎮道等督營
員州縣嚴捕有百餘人聞捕先竄分路追獲五十
人提省嚴辦得

旨舒常等已陸續具奏文綬係本省總督直至今始奏
何遲緩若此旋奏嘯匪之竄入湖南貴州界者經二
省官兵截拿仍復逃回現分路追捕續獲二十一
人又追至廣安擒斬八人生擒十七人餘黨俱即
逃散

諭曰匪徒聚集川省該督果能隨時嚴飭文武各員實力擒捕四處派員堵截於邊界有防何至逃逸別省乃文綬平日漫不經心一任地方官疎縱釀成致該匪踪跡往來如入無人之境其所為邊防者何在及匪徒竄入湖廣貴州等省結黨成羣搶掠滋事該督仍復安坐省城並不於要隘處親往督率此次摺內尚腴顏稱經楚黔官兵截拿仍復竄回一似置身局外者然文綬種種錯謬不可枚舉著嚴行申飭八月

文綬奏親往川東督捕餘匪得

旨文綬始終玩縱貽誤著降三品頂帶從寬留任尚書
周煌奏川省咽喉匪近年每邑多至百十餘人並有
朋頭帶頂坐轎乘馬白晝搶奪淫兇通省官吏罔
聞兵役不問甚至州縣吏胥身充咽喉匪恣行撻撻
諭曰咽喉匪肆行不法已非一日文綬身為總督乃竟漫
不經心以致養癰貽患甚至白晝搶刦拒捕傷差公
然無忌若不及早嚴辦將來黨羽日多安知不釀成

蘇四十三之事現須痛加懲創盡絕根株以戢凶暴而靖地方此皆文綬因循貽誤所致斷難復膺總督之任著革任發往伊犁効力贖罪四十八年

命回京四十九年三月卒

珠魯訥

珠魯訥滿洲鑲白旗人姓那爾乾隆二十年繙譯舉人二十一年以筆帖式在軍機處行走遷吏部主事二十四年遷員外郎二十七年調戶部顏料

庫三十一年正月擢湖廣荊州右翼副都統尋授
禮部侍郎五月調工部兼正黃旗滿洲副都統十
月署戶部侍郎三十二年五月兼署兵部八月

命為叅贊大臣駐雅爾尋赴雲南軍營統綠營兵四千
駐木邦土司甕團自莽什率七百餘人來降請於
清水河招商復業珠魯訥派弁兵彈壓十二月擺
夷探歇等五十人突出竹木林前鋒瑚什布把總
姚俊擊之遂棄械降珠魯訥鞠得探歇等為緬賊

守城狀盡斬以徇已而賊伏千家寨刦我偵事兵
珠魯訥派已圖魯侍衛色布騰効力總兵索柱等
乘夜搜捕賊潛遁派色布騰渡大疊江錫箔城抵
將軍明瑞營復令已圖魯茂漢探錫箔城抵松塞
路得

旨嘉獎將軍明瑞建橋大疊江兵得濟珠魯訥防賊潛
毀令叅將王棟領前鋒護軍兵千五百駐守三十
三年正月疏言自木邦至阿瓦城呼橋錫箔結工

宋賽順貴應設五台錫箔隣江險要派滿洲兵四綠
營兵三百餘四台派滿洲兵二綠營兵二百每台
撥馬六十以壯聲援

上嘉之時珠魯訥派索柱帶兵千人駐天生橋錫箔江
等處賊奄至叅將王棟等連戰兩日賊驅象運木
造橋我兵衝擊賊乘勢毀錫箔橋索柱等退守萌
蘆口賊肆擾木邦珠魯訥派總兵胡大猷領兵五
百迎擊西山賊守備龔田守領兵二百迎擊東山

賊珠魯訥率兵晝夜攻擊賊詭言退木邦緩我兵
未幾賊焚遊擊福珠營綠營兵潰賊夜圍中營珠
魯訥手書奏交筆帖式福祿突圍出旋自盡事

聞

諭曰侍郎珠魯訥以叅贊大臣駐劄木邦策應軍營因
索柱領兵赴天生橋遇賊退回並棄錫箔橋梁不守
以致賊匪尾入滋擾木邦珠魯訥悉力拒守禦戰相
持經十餘日尋以所統兵丁俱係綠營怯懦成習見旁

近小營失火紛紛潰散珠魯訥獨力不支即於營內
自盡雖與臨陣捐軀者相去一間其情亦屬可憫所
有應行優卹之處該部察例具奏

賜祭葬如例

命入祀昭忠祠

五福

五福滿洲鑲白旗人姓富察由世襲佐領兼烏鎬
章京乾隆二十年癸四川以遊擊用二十一年補

建昌營遊擊二十七年遷城守營叅將三十二年
遷維州協副將三十五年四月小金川土司澤旺
與鄂克什土司色達克拉構釁五福詳請發兵援
鄂克什總督阿爾泰檄責小金川澤旺服罪三十
六年六月澤旺子僧格桑復與構釁漸侵明正土
司大兵議進攻十二月五福領官兵土練五百駐
防梭磨界之樸頭三十七年九月授松潘總兵十
二月回營彈壓新附番人三十八年正月赴美諾

駐守糧運小金川平同松茂道查禮辦理別斯滿
新政屯練並漢牛十四寨新附番人事宜時僧格
桑竄入金川與土司索諾木為逆

上慮兩酋由丹壩軼出逃往郭羅克

命五福防範六月賊襲取底木達及大板昭營大兵由
登春進勸五福由後路往會夾攻七月奏赴梭磨
察閱

諭曰五福奏先令副將西德布等領兵速回丹壩分防

五福仍前赴校磨一帶察閱糧站並駕馭土婦卓爾瑪及大小頭人百姓安靜駐牧並飭將通金川卡隘加意防範所辦甚好前諭賞卓爾瑪名號綵緞傳諭獎勵五福到彼正可辦理此事畢後仍回丹壩駐守實力嚴防三十九年三月同副將李天佑領土兵夜毀穆爾津岡賊寨二生擒德爾日嘉等七人五月由作固頂赴兜烏當噶進攻播坵賊出碉抵拒敗之六月潛攻穆爾津岡賊碉克之燬其碉賊以死

來援五福奮勇接戰斃其衆七月大兵進攻五福
率漢土兵三百六十為應援令官兵作攻撲狀以
綴賊勢土兵伏作固頂水卡左右賊番五十餘衝
水卡伏發鎗斃頭人餘賊負傷竄土兵進攻穆爾
津山半賊礮賊於礮頂施鎗石五福督土兵斬礮
門施火彈斃賊十一月

諭曰朕閱戰圖凱立葉東北即達克扎爾其下即作固
頂革什戎岡又下即穆爾津岡與丹壩甚近今凱立

葉既經攻克進取羅卜克鄂博再進取格魯克古格爾提尤與丹壩相距咫尺五福正當乘此勝勢激勵土司選派土兵進勦五福即親帶官兵由丹壩一路進攻阿桂等並可與之預約為合力夾擊之計現當大軍深入復添此一路官兵賊衆難於支禦成功更可迅速著阿桂速飭五福協力進勦奮勇自勵以期立功受賞大兵尋攻克格魯克古了口接通丹壩五福隔山瞭大兵至即督兵將普籠籠瑪讓戰凋數

座同時攻燬於作固頂以下沿河設營卡防範十
二月大兵進攻勒烏圍五福由兜烏當哨夾攻賊
傷斃無算四十年六月進攻榮噶爾博攻燬賊碉
一七月大兵攻據巴克圖仰木山頂五福克其薩
木卡爾山下各碉卡與大兵合九月大兵分七隊
由達烏達圍進攻五福同總兵常祿保等接應閏
十月大兵由黃草坪突上截賊碉五福同副都統
普爾普在溝底樹柵前進大兵既克黃草坪賊糾

黨從山包後下拒五福與大兵內外夾擊賊敗竄
十一月官兵三隊由奔布魯木進攻五福同副都
統烏什哈達夜率第三隊兵圍賊碉賊越碉竄復
與第一第二隊兵合至西里正寨賊潰遁獲賊鎗
矛等械分攻瓦爾占舍勒固租魯夜移斂犇推賊
碉尋議叙功加一等紀錄二次十二月官兵分中
左右路進攻薩爾歪賊寨同都統海蘭察由中路
自上壓下賊棄寨竄復繞出賊寨後殲賊甚衆同

時克三處賊寨四十一年凱旋

命圖形

紫光閣儒臣擬贊曰斫門殺賊於滅金嶺焚碉燬巢
作固山頂馭番土兵越嶮踰幽丹壩突入獲其鎧
矛大軍既撤以兩金川地勢寥闊檄五福領兵三
千駐防美諾要地四十四年擢廣西提督四十八
年卒

莽喀察

莽喀察滿洲鑲白旗索倫人姓納喀塔由馬甲從
征準噶爾授藍翎侍衛乾隆二十三年正月隨領
隊大臣努三等領叛賊哈薩克錫喇擒其黨摩羅
達什扎卜等於拜塔克授三等侍衛十月隨將軍
兆惠勦回酋霍集占於葉爾羌二十四年二月授
二等侍衛閏六月隨叅贊大臣明瑞追霍集占至
霍斯庫魯克賊六十餘據嶺以拒我兵先至者九
百莽喀察奮勇臨陣鏖戰三時賊潰斬五百餘級

捷

聞得

旨嘉獎擢頭等侍衛

賜丹巴巴圖魯號二十五年

命在乾清門行走

上以西域既定頒賞論功

特詔圖諸功臣像於

紫光閣掄其功尤赫者五十人

親製題贊次則斬將搃旗建一績致一命者亦圖其形
而令儒臣系之以詞又五十人莽喀察預焉贊曰
控弦疆場橫梁沙磧還經黑水中流投策薰屯蟻
聚跳盪隻身捉生燒寨勇著索倫二十七年叙功
授騎都尉又一雲騎尉世職三十二年派往雲南
軍營

賜銀百兩並給副都統銜三十三年

命為御前侍衛三十六年九月隨將軍溫福赴金川軍

營授領隊大臣十二月大軍由向陽坪進勦巴朗
拉賊碉莽喀察偕巴圖魯委署翼長占闡納等以
兵四百五十自山右奮攻奪碉及木卡六肘被創
回卧龍關調治溫福以

聞

詔來京授蒙古副都統遇缺坐補三十七年二月以創
卒

諭曰莽喀察打仗奮勉傷發身故殊堪軫惜著加恩交

該部照陣亡例議卹尋議給騎都尉併前世職為二等輕車都尉

賜祭葬入祀昭忠祠金川平復

命圖形

紫光閣

御製贊曰索倫善射其中稱最西師建勲紫光閣形繪逞其猿臂搜彼蟻封不虞創重歎惜何窮嗣子綽爾岱襲世職



欽定八旗通志卷一百七十